



三國佛法傳通緣起卷上

東大寺沙門

凝然

述

佛教大學藏



273855



273855

夫毗盧遮那釋迦世尊本則非古非今離待對於思
議之門迹則能今能久開救攝於機感之路迦毗羅
城示降誕之迹摩訶陀國顯果極之德道樹祇林飾
七處九會之嘉運仙苑提河播三衍一實之宏儀法
門八萬隨應宜緣敎迹十二契會體義畢波之窟三
藏分路鐵圍之洞二諦異衢衆聖應時降臨諸賢託
緣出現西天弘大小之法東土敷權寶之敎故覺母
文殊送四百五十之年序補處彌勒有九百餘歲之
降下各弘佛世之親聞俱傳寶道之契範迦多衍那

立八捷之章訶梨跋摩分四諦之段三論是正觀之
幽旨五論乃中實之玄奧出現南天造之降下中印
說之十八五百小宗之諍論二十三十大乘之唯識
龍軍堅慧演深奧之義馬鳴無性立卓朗之宗東邦
弘通專守印度之車範西國流演要思震且之治潤
教法傳通普遍為心諸國非一衆域悉布連陸之峻
境隔海之群土任那百濟皆傳梵天之教新羅高麗
俱食印度之宗五印封壇各有邊國皆弘佛法建興
真俗具陳事迹難知難言且就三國示傳法迹一明
天竺宗源二陳震且傳法三述日城弘通廣相難述
略舉塵露

天竺佛法傳通

如來是開法之大師餘人乃稟教之助化如來成道
第二七日說華嚴經小乘六七日等後說四諦等法
成道二年度五比立三年度三迦葉及千比立四年
在象頭山爲龍鬼說法五度舍利弗目連及二百
五十弟子舍利弗七日得羅漢目連十五日得羅漢六年建祇園精舍七
年爲婆薩和菩薩等八人說一卷般若經如是十二
年一一明說法相十二遊經第十二年佛還父王國
中本起經六年時還十二年中說四諦教三十年中
說般若經四十年後八箇年說法華或五年說十六
年時說維摩經菩提留支云成道五年說大般若云

云十六年時說大集經第十年時說如來藏經二十八年說瓔珞經二十九年說摩訶般若金剛般若天王閻般若光讚般若三十八年說解深密經四十二年說觀無量壽經與法華初集同年觀經猶前於圓寂時說涅槃經如來一期四十九年隨緣制戒隨宜說教前後森羅佛滅度後衆聖結集分大小異開五乘別如來滅後五師持法各二十年優婆毀多時橫分五宗二百餘年大衆部中分出九部三百餘年至四百滿上座部中分十一部本末合成爲二十部根本二部百年時分此是小乘諸部分派如來以律付優婆離自爾已後次第傳付僧祇律中列二十七人

善見論中列二十四人善見論七百年賡造二百三十六年師子國中佛法流傳如來滅後一百年中提婆設摩羅漢造識身足論三百年初尊者世友造品類足論三百年中迦旃延子造發智論三百末世年文造眾身足論四百年時五百羅漢造婆沙論九百年時達磨多羅造雜心論六百年時馬鳴菩薩造起信論等七百年時龍樹菩薩造大無畏論年論十二門論智度論等堅慧菩薩七百年時造法界無差別論九百年時世親菩薩造俱舍論衆賢論師造順正理論顯宗論世親菩薩三十頌等諸論皆此時造其後十大論師各釋三十唯識華嚴法華龍樹誦傳無

菩薩造攝大乘本論無性天親各作解釋天親菩薩造淨土論解釋三經又造十地論釋華嚴十地品龍猛菩薩初開鐵塔值金剛薩埵受法灌頂大弘真言教龍智菩薩傳受流布久住世間大利後代自餘諸教流布五印廣多無量難可具陳震且所弘一十三宗皆以天竺所弘爲本毗曇俱舍依天竺諸毗曇等成實論宗如依訶梨跋摩律宗即依五師傳持三論即依龍樹提婆涅槃宗即依本經地論宗依十地經十地論淨土是依三經一論禪法達磨以心傳心迦葉阿難等二十八祖傳正法眼藏攝論宗即依無著世親本釋二論天台宗即依法華建立圓頓一乘

華嚴宗即依三部華嚴十地論等法相宗依解深密經瑜伽論等真言秘宗即依內證真說三部密藏本經儀軌等如是諸宗皆有所依經論等教依此立宗義理極成行用可軌化益無窮

震且佛法傳通

如來滅後一千十六年佛法傳漢地翻譯弘通自爾已後諸教漸傳隨譯依行講敷流演或從西土傳之或於此國立義皆以佛經爲大據以西天論爲所憑漸次弘傳遐世繁興總有十三宗則漸漸流傳一毗曇宗二成實宗三律宗四三論宗五涅槃宗六地論宗七淨七宗八禪宗九攝論宗十天台宗十一華嚴

宗十二法相宗十三真言宗上來所別多依興起弘傳講數次第舉之

毗曇宗

夫毗曇宗者是薩婆多部如來滅後三百年初上座部中離分立異後分離皆從此出若約本源如來滅後一百年時第五傳法優婆鞠多下橫分五部薩婆多部即其一也三百年初薩婆多者是後分部取百年時薩婆多名義同彼故如雜心法救取婆沙法救三百年初者指滿三百年時言初如來滅後三百餘年迦多衍尼子大阿羅漢造阿毗曇八捷度論苻秦僧伽提婆共竺佛念譯爲二十卷與唐朝玄奘所

譯發智論二十卷是同本也如來滅後四百年時

舊云

六百五百羅漢造大毗婆沙釋發智論玄奘譯之爲二百卷昔北涼天竺浮陀跋摩譯爲百卷号舊婆沙兵火所燒六十卷存解三捷度七百年時法勝羅漢嫌婆沙太博略撰要義作二百五十偈名阿毗曇心譯成四卷世号法勝毗曇東晉瞿曇僧伽譯又有法勝阿毗曇心論六卷優婆扇多造爲利弟子於法勝論伽增義理高齊那連提耶舍共法智譯千年之間達磨多羅尊者以婆沙太博四卷極略更撰三百五十偈足前四卷合六百偈名爲雜心有十一卷宋代僧伽跋摩譯衆事分阿毗曇十二卷宋天竺三藏求

那跋陀羅譯與玄奘所譯品類足論同本異譯甘露
味阿毗曇二卷尊者瞿沙造曹魏代譯失譯入名薩
婆多宗根本有七發智本論爲身以六足論爲足言
六足者一集異門足論舍利弗造有二十卷二法蘊
足論十二卷大目捷連造三施設足論迦多衍那子
造其論未譯上三足論並佛世時造四識身足論十
六卷佛滅百年提婆設魔羅漢造五品類足論十八
卷筏蘇密多羅唐云世友造六眾身足論三卷亦世
友造上二並佛滅三百年末造五事毗婆沙論二卷
尊者法救造如來滅後九百餘年世親菩薩造俱舍
論梵本九千頌玄奘三藏譯爲三十卷與陳真諱三

藏舊譯俱舍論二十二卷同本異譯順正理論八十
卷衆賢論師造破俱舍義顯宗論四十卷衆賢論師
造直顯有宗正義毗曇薩婆多宗論藏東流分齊部
數如是依學此等諸論名毗曇宗然大唐代貞觀已
前學舊毗曇玄奘新譯已後專學新翻諸論俱舍焉
本兼學發智六足毗婆沙等罄薩婆多幽旨俱舍爲
門名俱舍宗俱舍論主顯雖辨明薩婆多義而密經
部所立爲善未必婆沙評家爲本隨自所好取捨造
論諸師多釋新俱舍論普光法寶神泰圓暉等師是
也新譯有宗皆玄奘三藏翻所傳也三千門人七十
達者服膺鑽仰大唐一均無不習學昔東晉第九主

孝武帝諱曜太元十六年辛卯北天竺罽賓國瞿曇僧伽提婆晉云衆天創譯法勝毗曇四卷此即東夏毗曇宗之初也當日本國人王第十七代仁德天皇七十九年辛卯自爾已來迦延毗曇八捷度論雜心毗曇優婆扇多六卷心論舊舊毗婆沙舊俱舍等數朝漸譯諸師各講相承弘通橫暨甚昌唐朝新譯有宗諸論大小十部傳譯詳悉舉世講敷造疏述章譜師競學蘭菊諳矣

成實宗

夫成實論者如來滅後八百九十年罽賓國小乘薩婆多宗英學之近鳩摩羅陀上足弟子中天竺國娑

羅門子訶梨跋摩此云師子鎧之所造也跋摩本是數論外道苗寢學者弘彼宗法所計豎強後棄邪出家即學有部宗然彼跋摩慨羅陀所宗近在名相意致未玄遂徙轍僧祇兼學大小鑽仰九經研究三藏二部五部貫統無遺二千五百包括罄旨道振罽賓聲流諸方造成實論弘其所宗二百二品十有六卷成二四譯建章五聚明義卯度說之諸處學之昔姚十卷秦弘始十三年辛亥當日本國人王第十九代反正天皇御宇六年辛亥羅什三藏初譯此論明年十四年九月十五日譯訖此依開元錄明若依南山大師內典錄云弘始八年譯成實論開元錄主智昇法師

依成實論後記作此說也羅什譯論命僧叡令講之
什公三千門入皆弘此論講敷研尋橫堅不絕即道
生僧肇道融彙影慧觀道恒慧嚴僧標僧穀僧敦等
是也厥後宋代僧導法師初作論疏其門人僧音慧
威並善成論講敷弘通慧嚴弟子法智亦善成實道
高法師作義疏八卷齊僧鍾法師慧次法師梁三大
法師謂光宅寺法雲開善寺智藏莊嚴寺慧曼龍光
法師法安法師慧珠法師僧湧智順法寵慧韶等講
學弘通橫豎專昌成實論宗梁世盛說陳世繼弘宣
武寺洪偃法師彭城寺寶瓊法師白馬寺警韶法師
栖霞寺慧布法師並是陳世名哲各競弘持成論瓊

公講成實論九十一遍撰玄義二十卷即誦其義滿
二十遍成論文疏一十六卷通別解義無有所遺警
公講論五十餘遍四方義學雲集奔波隋代慧曉法
師靈裕法師智脫法師道莊法師等並提義網精研
法網至干唐朝者勝光寺道宗莊嚴寺保恭弘業寺
道慶莊嚴寺慧日武丘山智琰法師等俱弘成論秉
持攝化如來滅後經一千三百六十年至姚秦弘始
十三年初譯成論次第弘傳橫豎繁昌唐朝中運已
後講成實者漸少如來滅後九百年時彌勒菩薩降
下中卯說五部大論却是大乘甚深法相正是傳說
佛在親闍爾前大乘法相未弘故龍樹等大乘論師

建立法相專用小乘薩婆多等性相法數彌勒無著
世親已後大乘論師即用大乘所說法相提婆堅慧
等大論師等多守先規亦用小乘諸部法相震且諸
師唐朝玄齡歸朝已前並用小乘所立法相三論天
台涅槃宗等皆用有宗法數法門或諸師中具用成
實論宗法相如梁三大法師等是貞觀年後法相一
宗專弘自宗大乘深廣顯了法相華嚴一乘即用大
乘法相法義兼用小乘如愚法小乘所說義是梁朝
光宅大師日本國上官王三經疏中全用成實法相
立義隨世所用法應爾故

戒律宗

如來滅後經一千十六年天竺佛法創傳震且即後
漢永平十年丁卯也其後總經一百八十三年戒法
未傳至曹魏嘉平二年庚午行十人受此時戒法初
傳受行此是彙無德四分律宗所說戒體創所納得
而其廣律未傳漢地厥後經一百五十五年至姚秦
弘始六年甲辰譯十誦律是廣律初傳也次弘始十
二年庚戌譯四分律此是如來滅後經一千三百五
十九年此曇無德四分律宗廣律初傳當日本國反
正天皇御宇五年庚戌此後漸次僧祇五分二律傳
譯四分雖傳未廣講敷頗講餘律非是純一四分傳
後經五十六年至元魏亦云後魏第六主文帝延興

元年辛亥此年即當宋第六主明帝泰始七年并日本國人王第二十二代雄略天王御宇十五年辛亥佛滅度後經一千四百二十年其後有北臺法聰律師本學僧祇開通精詳而考震嶺初受專以四分羯磨停講僧祇創講四分從此已後專弘四分或口以傳或章以授作四分疏將二十家或立衆章或著諸鈔天下齊均地際平歲梁陳隋唐次第傳承普天寧土橫豎弘敷各被世門俱沾時賓礪宣素三宗互諍其金玉鈔主要家峙立義鋒資持會正兩宗蘭菊昔姚秦弘始庚戌譯四分律已來東晉餘運有一十歲宋朝八主五十九年南齊五主二君二十三年梁朝

四主五十六年陳朝五主三十三年隋朝三主三十七年唐朝二十主二百九十年唐朝之後五朝繼起一梁朝三主十六年其初年當日本國延喜七年丁卯二後唐三主十三年初年當日本國延長元年癸未三大晉三主十一年當日本國朱雀天皇御宇承平六年丙申己後四漢朝二主四年當日本國村上天皇御宇天曆元年丁未己後五周朝三主九年當日本國天曆五年辛亥大宋朝初當日本國天德四年庚申入宋朝後經三百十三年至等十五主度宗皇帝咸淳十年甲戌此數代中律法昌行包攝說括講通開敷師資相繼橫豎弘傳然咸淳八年壬申德

裕改元而復咸淳此年蒙古伐國帝避往南蠻國從
咸淳十一年方用蒙古年号即号至元十二年乙亥
也蒙古名太元國此年當日本國建治元年乙亥至
元年号至三十三年丙申其次大德元年丁酉當日
本國永仁五年丁酉大德已後于今經十五年即至
辛亥蒙古伐國已後律法廢絕不行雖有講通事不
如法問越海人如是陳語

三論宗

中觀論百論十二門論是名三論若加智論即有四
論姚秦弘始十一年己酉羅什三藏譯出中論四卷
當東晉安帝義熙五年日本國人王第十九代反正

天皇御宇四年己酉十二門論一卷弘始十一年譯
百論二卷弘始六年甲辰譯智論百卷弘始四年壬
寅初譯至同七年乙巳歲未譯塲解座四論並什師
譯百論提婆所造餘三並龍樹造羅什三藏生龜茲
國少年之時往北天竺隨禪頭達多學諸阿含經往
北竺時年甫九歲十二母携還于龜茲到沙勒國一
年留住誦阿毗曇六足論等什公已還龜茲國隨沙
車王之子須利耶蘓摩習學三論年滿受具從卑摩
羅又學十誦律子後往五天竺廣學內外大小諸典
亦還龜茲大弘佛法年六十三至東晉朝西涼州厥
後經十九年至姚秦國弘始二年己酉傳譯經論諸

宗本教多以羅什所譯爲源三論宗以羅什爲神州高祖成實論宗亦什師譯天台宗以法華經中論智論爲本爲源立三觀義菩薩戒宗梵網爲本阿彌陀經淨土本經金剛般若諸宗皆既般若心經諸師那膺維摩詰經諸宗解釋皆是羅什三藏所譯龍樹菩薩三論高祖真言祕藏龍猛所傳十萬華嚴龍樹所誦大不思議論龍樹大士造天台亦以龍樹爲高祖智論三哲一心中得中論三諦偈等此等並是所憑所立宗義曇鸞法師專仰龍樹爲淨發高祖十住婆沙難易二道爲立教本中論一部天竺釋之有七十家其中無著菩薩造順中論護法論師釋提婆百論

並安歸命阿闍梨句世親菩薩亦註百論安慧菩薩釋中觀論如是法相諸祖解龍樹提婆論布貴道詮有言四河入海同從無熾池而出七宗分鑣俱從三論宗而公三論是七宗之本諸宗是三論之末取顯蜜諸宗龍樹爲祖真言祕藏專在龍猛羅什三藏譯三論竟舉世講說通國習學三千門人皆悉鑽仰八宿上首各互弘通道生上足有曇濟法師道朗僧詮繼踵弘敷法朗吉藏承跡永藍僧導道涅宋代耀燈僧鍾智林齋朝飛風慧勇慧布並陳朝敷教慧塔法燈同隋世弘宗至入唐朝風光彌昌智枝慧瑜法敏慧璿慧曉雲眷元康玄壁如是等師橫豎弘布彌綸

普天敷遍廣地者也

涅盤宗

北涼高祖武王元始三年甲寅天竺曇無讖三藏初譯涅盤經至同十年十月二十三日譯竟一部四十卷文義周備焉初譯之年當東晉安帝義熙十年姚秦弘始十六年日本人王第二十代允恭天皇御宇三年甲寅南山內典錄云此涅盤經摠十萬偈今出四帙止三萬偈所少二分有餘若具本文以唐言度則百有餘卷比本經已譯舉世開敷宋慧靜法師曇無成法師僧莊法師道汪法師靜林慧定是斌超集法瑞道登曇慶道盛如是等諸師開宗立義製疏作

章師資相承以通多端立此芳涅槃宗講通流傳不絕隋朝慧遠法師意在涅槃彼門人智微法師興涅槃宗相州法礪律師學涅槃宗西河道綽多講涅槃南山宣師意在涅盤京北法寶立涅槃宗舉五時教攝大小典大日本國昔於大安寺真言院之傍弘涅槃宗講敷彼經號常修多羅宗是也

地論宗

華嚴大經有七處九會其第六會十地一品品龍樹菩薩於海龍宮誦此華嚴經九會等十萬頌文出闍浮提流布五印後人摘第六會十地一品別行流傳菩薩造論釋此一品即堅慧菩薩金剛軍菩薩等其人

也如來滅後九百餘年天親菩薩釋十地經名十地論即第六會十地一品別行五天名十地經天親論中具牒本經一一解釋昔後魏亦云北魏第七主宣武帝永平元年戊子之歲四月上旬命北天竺三藏菩提留支此云道希并中天竺勒那摩提此云寶意及傳譯沙門北天竺佛陀扇多并義學諸儒一十餘人在太極紫蓬初釋此十地論上皇自親筆受後付沙門僧辨等至同四年辛卯之歲夏首譯竟一部十二卷始末整足焉留支勒那各譯一本光統律師自解梵文合兩三藏對御和會合成一本永平元年戊子當梁高祖天監七年戊子日本人王第二十七

代禪字繼體天皇二年戊子才地宗龕創被神州光統律師十地宗匠光統門人有慧順法師道慎法師俱為神解之秀各立若干門輩靈裕慧藏慧遠智矩並隋朝高匠道宗法侃靈幹辨相俱唐朝法英齊朝大僧統合水寺法上者地論涅槃之高德也道慎師事稟承所宗大禪定寺靈璣法師隨淨影寺慧遠習學地論辨相法師亦從遠公慧覺法師著十地疏如是諸師講敷地論建立宗旨非一衆多唐朝聖運盛弘華嚴地論啻是一會法門後代漸次講者不多屬華嚴宗別非宗故

淨土宗

前魏之世秉僧鎧三藏譯無量壽經二卷宋世曇良耶舍三藏譯觀無量壽經一卷燒秦羅什三藏譯阿彌陀經一卷如來滅後九百餘年天親菩薩造無量壽經優婆提舍一卷名淨土論亦名往生論後魏菩提留支翻譯弘之曇鸞法師受之留支留支授觀無量壽經鸞師註淨土論道縛禪師歸宗爲祖善導承繼造疏弘宗懷感法照少康知玄感弘淨教昔廬山慧遠法師創開蓮社弘持淨教十八賢衆條習淨教乃至後代開敷弥昌後世慈雲元照等師弘敷淨教橫堅耀光念佛門末代規矩三經一論爲所憑教上古廬山法師中古曇鸞道縛善導懷感等師後代

慈雲靈芝靈祐律師先學律宗次學台宗宗有所證次亦弘律南山律師三大律部各施記解後研淨教二十餘年取捨諸師作二經疏陳自正義依承者衆訖述非一天下淨教皆歸彼義行業義解事在一均泉涌俊哲不可乘法師遠越波瀾入宋學法正傳台教律宗兼傳靈芝淨教即是淨教相傳規模厥後彼寺宗師智鏡大德入宋傳律亦習淨教遂還本寺昌弘所學淨教所傳泉涌爲本然日本所弘皆用善導鏡公本學善導彼此兼包取捨在意後二大德允公阿公皆兼京師靈芝二途兼正兩門亦在意慮

禪宗

禪門法理由來良久三代僧傳皆舉習禪之德數世
法匠多有靜慮之學或初開荒途或自尋教典並學
路之由籍宗途之漸次也梁室已後學道稍多或達
磨門菜或餘宗兼而慧勝慧景道善意學僧那慧滿
覺明心地諸大乘宗皆有禪法教相觀行要飛雙輪
天竺傳法第二十八祖菩提達磨梁朝嘉運西來化
物以心傳心事超言象義在純一非兼帶城正法智
眼次第相付靈知妙心連續傳授慧可僧璨風憚相
隨道信弘忍芬郁端肅五祖之下南北分宗南宗亦
開五家七宗北宗純一未必相諍五祖弘忍之下有
神秀禪師是北宗始祖普寂禪師承于神秀寂禪師
甚昌

下有道璿禪師日本天平八年丙子來朝住大安寺
弘所習學禪法律法璿公以禪授與同寺行表和尚
行表授之最澄大德最澄大德後習天台即入唐受
法開比叡山大弘天台宗兼弘禪法日本禪法傳教
大師發其風芳與台宗禪一均弘通南宗禪法後代
其昌五家之後亦分二宗總號七宗南宗禪法後代
之中稍施芬郁日本禪法近代當世華洛餘方流傳
甚昌

攝論宗

攝大乘論者無著菩薩解釋阿毗達磨經十萬頌中
攝大乘一品天親菩薩更作釋論解本論文真諦三
藏梁代西來至陳第二主文帝天嘉四年癸未別釋

本論三軸成部翻譯釋論爲十五卷

釋論之中具牒本論

門人各講此論師資相承立義製疏義勢森羅施其

光用諸師翫習号攝論宗慧曠法師親從真諦三藏

聽攝大乘論普光寺法常法師真諦孫弟於攝大乘

專所精研法常弟子有智儼法師講敷華嚴兼研攝

論道岳法師慧休法師並攝論揚名僧辨大德靈潤

大德俱攝宗播德栖巖寺神素弘地攝二論仁壽寺

海順亦通地攝兩宗崇聖道場靖嵩法師專弘攝論

大興國寺法祥大德是慧遠弟子兼研攝論十地如

是陳隋唐朝諸師翫攝大乘講文製疏天下一均無

不服膺然攝大乘法相宗論玄辯三藏傳法相宗普

天九州無不槩風攝大乘論入法相宗通暢顯揚無
有異路或唯識論引六部經十一部論成唯識義攝
論是隨一法相宗專學之十殊勝語貫諸法義佛法
湧府窮源盡性而已

天台宗

北齊之代慧文禪師修得無生法忍開顯一乘妙理
此當梁之未陳之初運焉網領整足證道精義次南
岳慧思禪師精大詮而廓爾入妙理而朗然登相似
之階居根淨之位大陳之世化儀祥々顯揚一乘引
發三昧次有天台智者大師稟承南岳入法華塲妙
悟開發證陀羅尼位登五品身備十德開四教路通

八萬誣立五時門判五千法陳隋二代敷演大被神
地九州化儀廣布自爾已來師資相承弘通繁昌敷
演縱橫章安是結集之匠荊谿乃詎述之英行滿道
遂如天之日月知禮仁岳似時之鸞鳳遐方弘演終
古流通啻是天台教觀而已

華嚴宗

昔東晉第十主安帝義熙十四年戊午覺賢三藏傳
譯六十華嚴經厥後諸師講數衆哲開演製疏作章
釋文立義翻譯本經當日本國人王第二十代允恭
天皇御宇七年戊午至陳之嘉世有社順禪師是清
涼山文殊應化居終南山弘布華嚴開五教止觀立

三重法界圓融妙義方提綱領智儼大師發揮五教
證悟六相開濟弥綸香爲大師普賢應迹顯揚一乘
恢弘十宗清涼圭山高張圓網淨源師會廣轉教輪
杜順尊者年三十七終南九州盛播法化即當日本
國人王第三十四代推古天皇御宇元年癸丑即隋
開皇十三年癸丑也杜順大師至大唐第二主大宗
皇帝貞觀十四年庚子入滅春秋八十四年時智儼
大師年三十九第三高祖香爲賢首大師大周則天
聖后嘉運大播化儀一天歸敬四海朝宗大唐第六
主玄宗皇帝先天元年壬子賢首入滅春秋七十當
日本國人王第四十三代元明天皇御宇和銅五年

壬子大唐等十四主文宗皇帝開成四年己未清涼
大師入滅春秋一百有二當日本國人王等五十四
代仁明天皇御宇承和六年己未

法相宗

大唐第二主大宗皇帝貞觀十九年乙巳玄奘三藏
從西天還譯所賈經論等弘所習法相宗三千門人
七十達者四般上足一秀入室舉世學法相宗經國
習唯識教出萃高足一般入室慈恩基師即其人也
二藏眼目百本疏主目放神光口流辨河溜洲撲揚
繼踵敷教義忠如理並肩立義因內二明騰羽翼於
義天教觀兩門馳論乘於法地後代連踵不絕永世

履蹤無廢

真言宗

大唐第六主玄宗皇帝開元四年丙辰善無畏三藏
始屆長安東夏之中創弘秘教當日本國人王第四
十四代元正天皇御宇靈龜二年丙辰三藏創譯大
日蘊悉地經等及諸儀軌等開元八年庚申金剛智
三藏初到東都大寶秘教梵本翻譯轉授弘通開元
庚申當日本國養老四年庚申不空三藏年甫十四
隨金剛智方來東夏至三十七往南天竺遇龍智菩
薩更受金剛頂瑜伽五部秘藏等天寶五年丙戌歸
至上都當日本國人王第四十五代聖武天皇御宇

天平十六年丙戌玄宗深敬勑令譯經即金剛頂經般若理趣諸儀軌等密藏所有諸經秘典并密嚴仁王等諸部經教大開譯場皆悉翻傳善無畏等三人三藏皆隨龍智菩薩習學真言隨諸三藏受秘教者各盡懇志其數其多不空三藏弘傳尤久興善含光新羅慧超慧辨又慧果元曉覺超慧琳等並隨不空三藏習學秘教如是諸師弘密藏者大唐甚多不可具舉上來所陳一十三宗大小諸教並是震旦漢地之中所傳興宗上古已來乃至後代漸漸傳興競行流演此十三宗旨歸多途或是大小二教轍異如毗曇成實是小乘宗律宗一藏教在小乘行通大小震

且日域諸師斷興律是大乘直入一乘三聚圓戒於律儀行用諸律藏諸部律藏與大一故菩薩萬行所應行故菩薩戒律未傳來故自餘十宗皆是大乘或是化制二教義別律宗是制餘皆化教或性相二宗分途如法相唯識是法相宗華嚴天台等是法性宗或聖道淨土宗異如淨土教是淨土宗餘宗皆是聖道教宗諸大乘宗有說淨土所立義門屬彼彼宗不應別立爲一宗教然一類機別成教行如善導等故爲別宗或禪教兩門或顯密二教如是分路無不括盡始來滅後一千十六年後漢第二主顯宗孝明帝永平十年丁卯摩騰羅漢賚佛經等始來漢地當大

日本國人王第十一代垂仁天皇御宇九十六年丁卯自爾已來大小乘經律論漸次傳來西來三藏遠越嶮路方入漢境以隸字替干梵書以漢語易干天語所詮義理彼此不別名之翻譯匡詳不易復有從漢往梵之者法顯三藏初開荒途其後往往至彼者衆博譯聖教繼續甚多橫堅數朝滿二十代古來諸師隨所樂經各事講學互立門輩弘所習學若以此為宗宗承甚多焉或從天竺傳來弘之或放漢地立宗傳之建立雖多取廣既習不過十三如上已列雖十三宗後代澆漓漸次廢怠所學不多

三國佛法傳通緣起卷上

三國佛法傳通緣起卷中

東大寺沙門 猗然 迷

大日本國諸宗傳通

夫大日本國人王第三十代天國排開廣庭欽明天皇
御宇十三年壬申十月從百濟國創傳佛法彼國主聖明王自作願文送獻日本聖朝乃金銅釋迦佛像并幡蓋等及經論若干卷是也次第三十一代聖主淳中倉太珠敷達天皇御宇六年丁酉十一月復從百濟國彼國之王獻經論若干卷并律師禪師比丘尼咒禁師造佛工造寺工六人遂安置於難波大別王寺聖德太子六歲時也明年七年太子披覽彼經

論選六齊日禁斷殺生下勅詔於諸國普禁殺生如
是漸々佛法傳世持法之僧徙他國來佛法漸弘人
皆歸信其間有守屋大臣破滅佛法等事以太子方
便國皆歸佛法堂塔多興寺宇廣造推古天皇御宇
佛法僧宗持昌諸宗漸傳衆教大興佛法初傳漢地
之後三百餘年佛法從漢傳百濟國厥後百濟一百
餘年壬申之年法傳日本是故日域佛法監觴從百
濟來隨朝佛法未傳日域 推古天皇御宇十五年
丁卯太子遣妹子於大唐衡山召先身道具等厥後
第三十七代聖主孝德天皇御宇白雉四年癸丑道
照和尚往大唐國隨玄辯三藏學法相宗自此已後

漸漸往還諸師習學佛法而還傳法高僧往還傳法
乃至後代往々不絕日域佛法總有八宗古來諸師
漸漸傳之

一三論宗二法相宗三華嚴宗四俱舍宗五成實宗
六律宗七天台宗八真言宗隨一一宗陳弘傳相
三論宗

百齊佛法傳日域後至推古天皇御宇三十三年乙
酉經七十四年當大唐高祖武德八年乙酉此年高
麗國王貢僧慧灌來朝此乃三論學者隨大唐嘉祥
大師受學三論而來日本是日域界三論始祖而未
講三論裹玉而未開從此前年觀勒法師自百濟國

來此亦三論宗之法近亦未講通法教至第三十七代聖主孝德天皇御宇乃請元興寺僧高麗慧灌法師令講三論其講竟日任以僧正此乃日本僧正第
二
第一僧觀勒然僧網補任記云慧灌觀字法師第三十四代推古天皇御宇三十三年任僧正焉有此異說若會異說本元興寺有九僧正謂慧觀觀勒慧師慧輪等前後補任北等僧徒皆為聽衆講論竟日摠僧正福亮授智藏僧正智藏越海入唐重傳三論遂乃歸朝弘通所傳是第二傳也智藏授法道慈律師道慈第四十二代聖主文武天皇御宇大寶元年辛

又越海入唐。摠傳六宗三論爲本。在唐學法一十八年。第四十四代元正天皇御宇。養老二年戊午。道慈歸朝。此年遷都於奈良。經十一年。道慈於唐寶西明寺圖樣而來。即奉勅詔遷古京。本大安寺於奈良。京任西明寺圖樣。華講周備。即於彼寺弘在唐所學。宗三論爲本。兼弘法相真言等宗。道慈在唐十八年間。普學大唐所有諸宗。善無畏。三藏開元四年丙辰來。唐道慈在唐。具經三年。其間道慈隨善無畏。習學真言。大安寺有慶後律師善議。大德隨徙。道慈俱學真言。慶後大德專以真言爲其本宗。乃愛宕山。本願也。三論一宗從唐土傳有三代傳。一云慧觀。僧正傳。

二云智藏僧正傳三云道慈律師傳孝德天皇御字
大化二年丙午慧師慧輪智藏三般同時任僧正是
三論講竟日之勒賞也智藏上足有三般近乃道慈
智光禮光也智光禮光奈良新元興寺住侶立仙光
院弘通法宗莊嚴極樂房圖安養依正安置彼房是
智光法師所建立也如來滅後經一千五百七十四
年乙酉之歲慧觀來朝來朝之後二十一年未廣講
敷大化二年丙午初開三論講場此即佛法傳日本
後經九十五年始講三論其第二傳智藏僧正未詳
時代應勘僧史第三傳者道慈律師大寶元年辛丑
初傳之後經十七年當大唐第六玄宗帝開元六

年戊午善無畏三藏來唐之後經三年焉道慈天平
十六年甲申十月入滅年七十餘善無畏三藏於唐
翻譯大日經後來日本國初著東大寺西南之阿_古
傳云結庵八十日住後廬來目寺東院之岫經二箇年七百二十日住其間建立多寶大塔高八丈移南天鐵塔之半分以佛舍利三粒納寶塔之底以大日經七軸安刹柱之下然後三藏還大唐國開元二十三年乙亥入滅春秋九十九當日本國天平七年乙亥善無畏三藏來至日本年代未詳然開元十二年已後翻譯大日蘊悉地蘇婆呼經三藏爲一行禪師講大日經隨講記錄成二千卷此即一行具以三藏講授口傳

如言記之全是三藏自親解釋非一行自作只是具
結集最初草本弘法大師傳之弘通唐朝俊人取捨
文句或為十卷十四卷等開元十五年丁卯十月一
行入滅春秋四十二當日本國聖武天皇御宇神龜
四年丁卯其後善無畏應是來日本國即神龜五年
戊辰次天平元年己巳二年庚午應此時代未立東
大寺前當此寺西南之阿結庵居住于後弘法大師
於此處所建立真言院惣言南院者是也其後三藏
歸大唐者應是天平三年己後焉三藏西來先譯求
聞持法道慈傳求聞持法者即隨此傳受道慈律師
於日本國應謁善無畏其時道慈造大安寺土木絡

功昌弘宗教道慈授三論法義於善議善議授法於
安澄勒操西大寺實敏大僧都受法於安澄大德即
弘之彼寺西大寺三論宗者實敏所弘也自爾已後
彼寺學三論宗名哲繼踵橫豎弘通弘仁聖代玄教
律師製三論大義抄四卷奉勅詔造之法隆學問
寺昔元弘三論宗布貴道詮及貞玄律師等即法隆
寺三論宗也近代弘法相宗從昔習學太子三經疏
近代已來昌致學業本元興寺本學三論遷彼寺於
平城都已來專弘三論智光禮光俱住彼寺智光授
法於靈叡法師靈叡授之於藥寶法師藥寶授之願
曉律師此等諸德皆元興寺三論宗也願曉授法於

聖寶僧正聖寶者七大寺之檢校也以三論為本宗
兼學法相華嚴因明俱舍成實顯宗義途精竅究暢
秘藏真言研窮旨歸包括之德無敵對者遂於東大
寺建東南院以爲永代三論本處即以 宣旨元興
寺三論知識供見遷于東大寺此寺元學三論八宗
兼學自昔傳來人王第六十代 醒醐天皇御宇延
喜五年乙丑聖寶建此三論本處補此院主者乃三
國相承三論長者昔者諸寺之中三論碩學以官府
宣爲宗長者東南院主代々碩德皆爲其選至第七
十一代聖主後三条天皇御宇殊以東南院務爲宗
長者所被 宣下東南院務聖寶已後于今一十八

代顯密兼學作宗貫首但勝賢代密宗一寺中衆徒從昔至
今學三論者並肩繼踵互奪金玉俱諍蘭菊永觀珍
海樹朗重譽並中古學英乃智解鸞鳳也明遍貞敏
秀慧覺澄俱近代名哲是學識玉鏡也厥後樹慶皆
舜快圓定春芳繼踵騰旨不可勝計者也

法相宗

法相大乘應理圓實宗亦曰唯識宗亦名普爲乘教
玄辯三藏徃中天竺大傳此宗還支那國講弘天下
三藏上足有慈恩基師基師上足有淄洲師淄州上
足有撲楊師嫡祖相承橫豎彌昌此法相宗弘傳日
域朝代非一師承有數昔欽明天皇御宇壬申之歲

百濟佛法創傳此國厥後經一百二年至第三十七代孝德天皇御宇白雉四年癸丑道昭和尚越海往唐遇玄獎三藏學法相宗即當唐朝第三主高宗皇帝永徽四年癸丑玄獎三藏年五十一慈恩大師齡二十二道昭與三藏宿在同房與慈恩同學久在門下受學積年提誘殷懃特傳觀門干後歸朝即弘所傳三藏新翻經論諸典創傳日域即其人焉第二傳者道昭入唐之後經於六年至第三十八代女帝齊明天皇御宇重祚四年戊午智通智達般兩法師乘新羅船往大唐國遇玄獎三藏學法相宗大日本國此戊午歲始行維摩會爲永代規矩兼學法於慈恩

大師後還本朝大弘宗旨第三傳者道昭入唐之後經五十一年至第四十二主文武天皇御宇大寶三年癸卯新羅智鳳智鸞智雄三師俱奉勑命渡海入唐謁撲揚大師學法相宗或遇玄獎慈恩學習宗旨者然二師入滅經年序遂歸本朝大弘宗教智鳳慶雲三年丙午維摩講師第四傳者道昭入唐之後經六十四年至第四十四代女帝元正天皇御宇靈龜二年丙辰玄昉法師渡溟入唐乃謁撲揚智周大師研法相宗干時智周年三十八唐開元四年也玄昉法師在唐學法經二十年第四十五代聖武天皇御宇天平七年乙亥七月歸朝大於所傳妙揚宗旨四代連綿各傳宗教而智

鳳門菜經世甚昌玄肪所傳與鳳一合事無異途惣
通弘演道昭和尚授法於行基菩薩也智鳳智巒各
授法於義湧僧正義湧有七人上足謂玄肪僧正行
基菩薩宣教六德良敏大僧都行達大僧都隆尊律
師良辨僧正也道慈律師亦從學法即成八人然道
慈律師雖學諸宗三論爲本故專爲彼宗祖師普興
福元興南北兩寺學者衆多競立義理因內二明丘
諱金玉明黨相扇成兩寺異乃至當代興福一寺學
侶繼踵論難彌昌並是智鳳玄肪後裳門菜而已然
法相宗雖興福寺根本所學而諸寺多學無不弘敷
諱延祥僧正守印大法師守寵法師神叡小僧都廣

達大法師勝虞大僧都護命僧正明諱僧都平備已
講施平律師長源已講峯基律師賢應已講玄宗和
尚如是等師皆是元興寺法相宗也仲繼律師明哲
律師長朗律師戒明和尚慧達大僧都真慧律師隆
光律師平智律師藥仁已講義聖律師義叡小僧都
藏祚小僧都慈念律師等並藥師寺法相宗也東大
寺本願良辨僧正者雖建東大寺專弘華嚴宗而元
隨義湧僧正學法相宗故東大寺兼弘法相良辨弟
子或有華嚴法相兼學如安寃律師標瓊律師鏡忍
律師等或有唯華嚴宗如良興小僧都良慧大僧都
永興律師等三修律師平仁已講明一大德義濟已

講法藏僧都圓藝已講等並是東大寺法相宗也恭
演律師善海律師玄穀律師實敏大僧都平詮大法
師忠芬小僧都常騰小僧都延善小僧都淳珍已講
等並西大寺法相宗也大安寺亦有法相宗道慈律
師入唐學法歸朝之時最初講慈恩七卷章自爾已
來法相餘風大扇彼寺法隆寺中古已來習學法相
于今甚昌藥師寺習學法相干今弥昌興福寺者自
昔已來乃至後代專學法相學侶繁昌論難彌昌學
侶不知數鑽仰不限年智海釋大義峰峙峙欲陳述
其相承次第橫豎支派難率舉盡且舉一流嫡祖次
第智鳳義渾宣教大法師賢璪大僧都明福小僧都

延賓已講空晴僧都真喜僧正林懷大僧都主恩大
德或經
大僧都永超僧都湛秀已講覺晴大僧都藏俊贈
僧正覺無僧正貞慶上人貞慶之後乃至當代若干
英哲智德無非皆是貞慶後裔門流六宗長官自昔
孤在法相一宗補興福寺別當之人遂此前途應和
已後被置權宮維摩大會行在興福遂業遂講非唯
專寺他寺他宗亦遂洪業

華嚴宗

大日本國傳佛法後諸教漸弘諸宗亦昌華嚴圓宗
傳來是久然華嚴宗古德記述日本佛法初傳年代
摠有二說一昔新羅學生大安寺審祥大德記云僧

隅蘆入野官御宇宣化天皇即位三年歲次戊午年十二月十二日從百濟國佛法傳來宣化天皇即位二十九代帝主也二東大寺圓超僧都延喜十四年甲戌奉詔撰華嚴宗并因明章疏目錄彼序中云磯城鳴金指宮御宇欽明天皇十三年佛法始傳矣雖有二說若依多分圓超所說以爲正錄由此義故華嚴學者應以超錄定法初傳宣化天皇戊午年後經十五年至欽明天皇御宇十三年壬申彼戊午歲雖佛法傳事是草創趾基未廣不以爲定壬申初傳事歷天下是故諸家多以爲定壬申已後至第四十五代天瑞國押開豐櫻彥聖武天皇御宇天平八年

丙子之歲經一百八十年此年七月二十日大唐道璿律師來朝璿公是華嚴寺普寂和尚之弟子普寂即華嚴宗法近隨北宗神秀禪師傳達摩禪法璿公隨普寂習傳華嚴及以禪法亦明律宗亦善天台宗達菩薩戒璿公賈華嚴宗章疏始傳日本如來滅後至此丙子之歲已經一千六百八十五年宗教雖傳而未講弘當時有一高德沙門諱曰良辨凝神真原垂化俗林悲智潛用難可思焉欲弘此宗深發誓願決徹彌固遂感靈夢有一紫衣青裙僧從東方虛空下來告云汝欲弘演此一乘教請嚴智師以爲座主方於不空羈索之前可令開講云夢覺喜躍感悅無

極然嚴智師在元興寺良辨和上即往彼寺請彼大德其師荅云吾名是嚴智而心非嚴智然新羅學生大安寺審祥大德是真嚴智應請彼師講敷華嚴僧正良辨乃往彼寺屈請彼師大德辭之再三懇請固辭不向僧正和上干是奏聞仍以勑請此時方向遂以天平十二年庚辰十月八日於金鍾道場即東
羅索堂也亦大集京城名僧大德以審祥師爲其師宗方講宣此大華嚴經初講之時上現紫雲亘覆春山聖朝穀覽奇歎無量乃施綵帛一千餘疋天皇皇后及諸卿等施入衣等不可勝計厥年天皇四十五滿賀始弘一乘穀感祥由茲天皇即發弘誓大

願於此一乘極爲尊重特詔隆爲務救濟爲心矣遂以天平十六年歲次甲申歸命三寶降勅百寮肇建知識華嚴別供自爾已後每年不絕恒昌講敷爲永代式然則此華嚴宗平城術字勝寶感神聖武皇帝爲其初興大檀主以傳遐世天皇以東大寺爲首於諸大寺弘六宗教厥中大華嚴經最是根本法輪如來成道第二七日說覺帝人王最初同崇乃斯華嚴一乘而已故勑詔曰當今實爾何生恠恨願同趣者莫撥莫退勤勤學悟此一乘之大義已當知此宗最初傳者天平八年大唐道璿律師乃其人也講弘傳者丙子之後經五箇年天平十二年庚辰審祥禪

傳記
師乃歛近也發願初興者即良辨僧正是其英也良辨本隨義湊僧正學法相宗彼七人上足之一也今正發願初興華嚴金鍾道場執金剛神者良辨僧正之本尊也良辨元名金鷲仙人是弥勒應迹自造彌勒像安羅索堂執金剛神放光照內裏良辨奉祈聖朝安隱音聞內裏已達上聞乃被立勅便良辨奏聞奉禱聖朝安隱建立大伽藍祈禱懇志深契穀慮迺先賜以羅索堂以公家土功造營已畢此廳名金鐘寺天平庚辰華嚴初講即在此堂天平五年癸酉初造羅索院而此院中有二月堂安十一面像實忠和尚現身昇兜繆天遷四十九院中

觀音院行業勸請補陀落山觀音爲堂本尊修懺悔法兼安小像爲堂本尊今此不空羅索觀音懇名金鐘寺後立東大寺爲彼所管處華嚴本經懇有三部六十華嚴自昔已傳而未講演徒積年序隱密不弘八十華嚴大唐證聖元年乙未之歲始開譯場至聖歷二年己亥之歲首尾五年翻譯總訖聖曆己充當日本國文武天皇御宇三年已死之曆干後天平八年丙子玄奘法師僧正費一切經來即傳此經干後天平勝寶六年鑒真和尚來朝之時此八十經從身費來四十華嚴及清涼八十經大疏二十卷大同元年丙戌之歲弘法大師初傳此國當大唐第十一主

憲宗皇帝元和元年丙戌此四十經大唐貞元十二
年初譯名貞元華嚴經譯後經十一年方傳此國天
平十二年始所講之者乃是舊譯六十華嚴新羅學
生大安寺審祥大和尚屬講弘之選初演此宗審祥
即往大唐隨香象大師學華嚴宗即是親承高祖之
名哲也既以勑詔爲宗講師于時請慈訓小僧都福
寺最初當別
興鏡忍僧都圓證大德以爲複師請十六德爲
其聽衆首尾三年講六十經一年二十卷三年之中
絡六十卷以探玄訖講六十經審祚禪師三年終經
天平十四年壬午奄焉率矣厥後即請前三複師立
爲講師次第講數言講師者讀經論文初開義途立

理願旨窮盡綱目言複師者講師初開義理之後別
時如前講文立義顯揚莊嚴講師所說講師所說如
如來初轉法輪複師重敷如舍利弗第二轉法輪昔
智勝如來初說法華經後十六王子覆說彼法華今
立講師複師即此等例講師沒時複師轉補三般講
師各二十卷三年繼續揔盡一部次請元興寺叢智
大德以爲講師標瓊律師并性叢大德爲其複師亦
講六十經竟次智璪大德以爲講師澄穀大德春福
大德爲其複師講六十經并疏二十卷畢奉始經之
日天朝行幸廬舍那佛前證明彼講自此以後古經
及疏新經及疏講演繁多不可數量上依別供緣起

載之言始經之日行幸者應是講始六經八經之日
言新經及疏者是刊定記一十六卷釋八十經具言
續華嚴疏刊定記清涼大疏未傳度前以刊定記講
八十經東大寺者四聖垂應所建立也聖武天皇救
世觀音上宮太子再誕良辨僧正弘勒垂化天竺婆
羅門菩提僧正普賢化身行基菩薩文殊應現或為
大檀主立大伽藍弘華嚴宗或為祈禱師奉授一乘
於帝王或為供養導師奉果穀願或為勸進梁揀奉
助御願自餘開眼鯖翁傳戒雅樂乃至木工金師無
非皆是大聖應作翁之所荷鯖者八十華嚴經是也
以東大寺是華嚴宗故化來者以經表彰南大門懸

大華嚴寺名額大佛殿二階之間顯恒說華嚴院靈
額寺內遍滿皆學華嚴自天平十二年至延暦八年
已合五十年恒說華嚴自後講說干今不絕論難
決擇任持法命良辨僧正臨絡以華嚴宗付崇道天
皇崇道受囑於大安寺建立東院弘華嚴宗彼寺本
有審祥禪師曾講華嚴後更興之藥師寺正義大威
儀師者元者法相慈訓弟子慈訓兼學華嚴正義隨
慈訓亦學華嚴宗藥師寺亦有長朗律師者元是法
相學者正義奏聞以官府宣移長朗於華嚴宗長朗
隨正義學華嚴宗藥師寺有明哲律師隨慈訓學華
嚴長朗弟子有義聖律師於五教章多作私記錄長

朗義昔藥師寺如是弘通華嚴宗也西大寺亦兼弘
華嚴宗元興寺有嚴智大德弘華嚴宗大宋高僧傳
東大寺名鳩城大寺國分寺門懸金光明四天王護
國之寺名額是日本國摠國分寺門大護海內專保
天下國土豐樂隨由此門興榮弘法大師書此門名
額造梵天帝釋四大天王金剛力士形像安置額二
邊以示天等護國之相額之文字筆點有表國字極
大表國大榮國中王字體相極大表示 帝德彌綸
普大如是等也日本華嚴良辯為初興本願審祥是
初講祖師 聖武天皇乃造寺興宗之大檀主三大
祖師建興一乘永世紹隆規矩在茲良辨上足有實

忠和尚是十一面觀音應迹自餘安寃律師鏡忍僧
都標瓊律師良興小僧都良慧大僧都永興律師忠
慧律師等並良辨門人各秉宗教橫豎流演實忠上
足有等定大僧都是 桓武天皇御師範也 桓武
天皇東宮已前於龜瀨山峰現師子無畏之身示大
聖老翁之姿師子復本形顯童子之形必是五髻文
殊童子等定拜之奉進 臨幸於寺乃河內國西林
寺也彼寺是天智天皇之御願等定即是彼寺住僧
東大寺為本寺習學華嚴講敷不倦 桓武天皇踐
祚之後修造西林寺興隆東大寺顯揚華嚴紹續圓
宗即以等定大僧都補東大寺別當等宗大興宗教

雙建真俗延曆十九年等定奄逝春秋八十有餘西
林道場有等定房于後弘法大師自京往還高野常
宿等定遺房彼房干今安大師真影等定弟子有正
進律師進公授法干長歲和尚長歲兼因明師歲公
授法道雄小僧都道雄隨弘法大師傳受真言創立
海印寺弘華嚴圓宗兼真言城塲一方道雄授宗於
基海大德次良緒律師繼踵弘傳良緒之下有圓超
僧都有光智大僧都圓超延喜聖代獻華嚴宗并因
明目錄光智僧都日本華嚴第十代祖人王第六十
二代村上天皇御宇天曆元年歲次丁未當大漢高
祖開運四年丁未光智大德始律尊勝院爲永代華

嚴弘通本處司彼院務之人即爲日本華嚴宗貴首
光智已後乃至當代十有二代宗緒繼續建興二諦
紹隆三寶學侶並肩鑽仰宗教法徒繼踵論難精詳
光智五世門業有良覺大法師覺公門人有如幻景
雅兩哲如幻僧都幡州立寺名曰性海大弘華嚴學
業不絕景雅洪槁門人有高辨大德顯揚一乘播水
藍德開高山寺弘華嚴宗學業繁昌修練勇勵並是
本寺之清流圓宗之風芳者也辨曉法印者中古之
英近也論說兼備真俗並暢紹隆有功宗緒無墜宗
性權僧正者近代之名哲也智辨縱橫拖彌天之德
論難清椎播經國之量華嚴因明俱舍並相皆悉研

究無不精詳諸宗奧旨兼暢無遺辨曉若後白河天
皇御宇奉論說之勑詔宗性者後嵯峨天皇嘉運預
智解之勸賞智德聯跡不慙昔日大日本國華嚴宗
緒審祥良辨已來乃至當代貫首二十一代燈燈相
傳學業繁昌法法流演紹隆連綿

俱舍宗

梵具言阿毗達摩俱舍此翻言對法藏此論從婆沙
論而生焉婆沙解釋發智本論六足中義皆悉通會
發智婆沙是對法藏今此俱舍全取彼名此乃全取
他名有貳釋也是故取本名俱舍論俱舍爲門兼研
有宗諸論所說隨其章品彼此對當一一格之譜陳

貫括有宗義理無不究盡光師寶師俱解釋論兼盤
發智六足婆沙幽旨圓暉一師啻釋本頌而釋論難
義無不皆註解唐朝解釋圓暉頌疏多家群起互諍
金玉大日本國習學俱舍昔通諸寺各立義門附法
相宗研竅此論元興寺護命明全等乃其人也護命
僧正傳新羅智平法師義建立有爲法體不生滅義
餘先德等多是有爲法體生滅義也東大寺自昔已
來習學俱舍寺內所置八宗兼學雖俱舍宗附法相
宗而滿寺皆學諸宗學者皆學俱舍中古已來華嚴
三論兩宗學者各峙詞鋒互諍蘭菊兩宗學者自昔
已來達有宗義善俱舍宗以東大寺爲俱舍本處自

昔學者鑽仰功多發智六足貫括胸內俱舍婆沙包納肝底正理顯宗懸味舌端法勝雜心浮見眼前依毗婆沙作問答式言陳意許轉變相反忽聞問題令感人心如難提菩薩試阿羅漢似大乘論中轉變秘密義如是學者充滿寺中是東大寺俱舍宗不共德也華嚴三論兩宗學者既皆兼學有宗俱舍其師資相承事全同二宗血脉而或有承異師是隨時宜而已中古有秀慧顯範覺雄尊玄四英如須弥半腹有四大王焉各研有宗同婆沙四評家次有覺澄貞禪義海參信四哲俱舍婆沙瑩玉發智六足懸鏡論難縱橫決斷任運近代有良忠聖禪兩德如孔門濂夏

同什公肇數次有快圓定春兩雄是有宗之龍寫毗曇之麟鳳也彼同時有華嚴貫首權僧正宗性上綱非唯華嚴因朋為最極上首亦兼研俱舍宗薩婆多宗深義奧理探贛究底洞微盡幽大解孤絕之德深智猶標之譽加日輪映衆光同大海吞衆流若有難決之義共聖禪語詩耳當代滿寺俱舍學侶相繼不絕論難彌昌

成實宗

成實論宗由來良久日本佛法初傳之時成實宗與三論宗同時傳來是故後代以成實宗附三論宗聖德太子作三經疏以成實論爲法相門依光宅義以立義門光宅法師是成實師正弘大乘而以成實

判法性相高麗慧慈慧觀百濟慧聰觀勸並三論宗
法輪之匠此爲初起後漸傳數此等諸師皆通成實
太子以慧慈慧聰觀勸爲師習學佛法即是三論成
實宗義而已昔百濟道藏法師造成論疏有十六卷
上古傳來干今有之皆以成實即附三論自爾已來
彼宗之人相承習學東大寺三論宗昔日兼學成實
論宗講成實論以道藏疏又有成實義章二十三卷
未詳誰造又有成實義林二卷成實學旨說此等章
講論談疏昔日已來中古已前人各榮勵元興大安
西大法隆學三論處皆兼成論昔西大寺三論宗玄
敍律師作三論大義抄即成立成實宗附三論宗之

義俱舍附法相宗彼抄具明之東大寺中古已來三
論宗學侶雖不別講成實論而淨影大乘義章明三
宗中有成實義故彼宗人知成實義嘉祥大師章疏
文中多舉成實論宗之義破之折之淨影章中猶多
明成論義故後代學侶知成實義要在三論宗學者
之中成實論宗相承次第應知其相淨影義章三宗
義者毗曇成實大乘是也若依此義學彼章人亦知
毗曇道基法師攝論義章有十四卷亦明三宗毗曇
成寶攝大乘宗彼師亦作阿毗曇章十五卷明毗曇
義其中往往明成實義成實宗緣起如是
三國佛法傳通緣起卷中

三國佛法傳通緣起卷下

東大寺沙門 積然 述

律宗

律宗教法其來尚矣 欽明天皇御寧壬申佛法初傳厥後連續佛法漸傳壬申已後經三十七年第三十三代 崇峻天皇御寧元年戊申從百濟國獻於佛舍利及僧蓋工千時馬子宿禰請百濟僧問受戒儀式彼僧答云僧衆受戒以十人五人行之尼衆受戒於彼尼寺先行本法後往僧寺隨僧受之尼衆亦往二衆具足於中受之此國尼衆無其行法二衆不具不能受戒禪藏等三尼遂往百濟十戒六法具戒

三重皆已成就經三年歸尼寺儀式移此而來三尼
已歸他國僧衆來朝是多然人數不足諸緣不具尼
衆受戒其事全無他國僧衆即彼國中如法僧人此
國初起非如法受唯是相似緣不具故而僧極多不
可稱計推古天皇御宇三十二年甲申四月戊午
詔曰自今以後任僧正僧都應檢校僧尼即九月丙
子校寺及僧尼當于是時寺四十六所僧八百十六
人尼五百六十九人云即以百濟僧觀補任僧正如是
法務明年乙酉以高麗王貢僧慧觀補任僧正如是
雖有僧尼二衆未行如法受戒儀式第三十二代孝
德天皇御宇白雉二年辛亥十二月晦日於味經宮

請二千一百餘僧尼使讀一切經如是衆僧非儀式
受第三十八代齊明天皇御宇六年五月有司奉
勅造一百高座一百衲袈裟設仁王般若之會第
四十四代天武天皇御宇白鳳四年乙亥四月請僧
尼二十四百餘人大設齊會僧尼雖多未傳戒律天
武天皇御宇詔道光律師爲遣唐使令學律藏奉勅
入唐經年學律遂同御宇七年戊寅歸朝彼師即以此
年作一卷書名依四分律抄撰錄文即彼序云戊
寅年九月十九日大倭國淨御原天皇大御命勅
大唐學問道光律師撰定行法記奧題云依四分律
撰錄行事卷一上

學律藏而其歸朝與定慧和尚同時道光入唐未詳
何年當日本國 天武天皇御宇元年壬申至七年
戊寅惑者厥時唐朝道成律師滿意懷素道岸弘景
融濟周律師等盛弘律藏之時代也道光定謁彼律
師等習學律宗南山律師行事鈔應此時道光寶來
所以然者古德記云道宣律師四分律鈔自昔傳來
而人不讀披空送年月爰道融禪師自讀披之爲人
講之自爾已後事鈔之義人多讀傳記^上道融并智
環皆是通達律藏之人道融禪師 聖武天皇御宇
天平年中朗辨僧正由靈夢告請道融禪師爲說戒
師行布薩法此即梵網菩薩說戒即請智環法師令

講行事鈔此即世間漸講律藏然未行彼受具戒法
如賢環言鑒真和尚已前諸僧皆依瑜伽行三聚淨
戒自誓作法其從他受亦受三聚成七衆戒賢環大
德於維摩堂與思託律師論難之時即立此義成立
通受比丘得具足戒之義如行基菩薩隨德光法師
受具足戒者即是通受從他行相 天武天皇御宇
戊寅己後經五十九年至 聖武天皇御宇天平八年
丙子大唐道璿律師來朝此時多賈華嚴章疏及
律宗行事鈔等來朝璿公住大安寺恒講律藏行事
鈔善後律師等明律名近即彼門人也道璿律英雖

先來朝僧衆不足不能秉行結界登壇受具戒法營
恒講敷律藏而已天平丙子已後經十九年至第四
十六代女帝高野姬孝謙天皇御宇天平勝寶六年
甲午鑒真和尚來朝當大唐第六主玄宗皇帝
天寶十三年甲午干時鑑真年六十七欽明天皇
壬申巳後至此甲經二百三年於其中間雖有受戒
於百濟學律於大唐律師來朝等之事而諸緣未備
不行壇法鑒真勝寶五年十二月二十六日入大宰
府遣唐使等此年歸朝明年勝寶六年甲二月四日
鑒真入京今取此年為其初基數時方齊鑑真入京
已前數日之間僧衆俗侶遠往遣使慰勞迎接其事

極多入洛之日勅遣正四位下安宿王於羅城門外
迎拜慰勞引入東大寺安置同月五日唐道璿律師
天竺婆羅門菩提僧正各來慰問右大臣大納言宰
相已下官人百餘人來禮拜問訊後勅使正四位
下吉備朝臣真吉備來口詔曰大德和上遠涉滄波
來投此國誠副朕意慶喜無喻朕造此東大寺經十
餘年欲立戒壇傳受戒律自有此心日夜不忘今諸
大德遠來傳戒冥契朕心自今已後授戒傳律一任
和上又勅僧都良辨令錄諸臨壇大德名進內不
經於日勅授傳燈大法師位其年四月初於廬舍
那殿前立於戒壇天皇初登壇受菩薩戒次皇后

皇太子亦登壇受戒尋爲沙彌澄修等四百四十餘人授戒又舊大僧靈福賢環志忠善頂道緣平德忍基善謝行潛行忍等八十餘人捨於舊戒重受和上所授之戒後於大佛殿西別建戒壇院即移天皇受戒壇之土築以作之過海大師大唐天寶二年癸未乘船離唐當日本國天平十五年癸未逆浪五迴第六度時著日本地其間若難經十二年去天平五年癸酉勑興福寺永穀禪師大安寺普照大德入唐留學并請傳戒律之僧先請東都大福光寺道璿大德令向日本道璿年三十五天平八年丙子當唐開元二十四年丙子隨副使中臣朝臣名代之舶方

來朝矣而師僧不足不行壇法穀照二德留唐學問具經十年欲歸日本天寶元年壬午詣大明寺請鑑真師酬雅請故明牢發足而天平勝寶六年癸巳來朝傳律授戒宿擔滿足鑒真和尚是天台宗第四祖師從天合取者是第五世隨弘景禪師受具足戒并學台教弘景是南山律師親度授具弟子隨章安大師學天台宗鑒真隨道岸律師受菩薩戒即是三聚通受之法隨融濟律師學南山律鈔業疏輕重儀等道岸融濟並南山道宣律師受學弟子弘景融濟俱釋南山律鈔鑒真隨西京禪定寺義威律師聽法勵律師四分律疏一遍次就西明寺遠智律師聽彼疏一遍

次於東京授託寺從金修律師及慧策律師聽彼疏
各一遍後隨西京觀音寺大充律師聽礪疏五遍前
後始終學相部大疏摠獲九遍上之諸師並西塔滿
意律師受學門人也鑒真受具五夏之中加是遊學
究礪宣宗年二十六講礪律疏至三十一講南山鈔
及輕重儀年至四十講羯磨疏其後迄六十六四部
文籍常恒講說定慧證條內外該亘天台敎觀研究
精詳五乘洞達三藏通曉淮南江北傳燈明朗修造
故寺八十餘所繼納袈裟一千領布袈裟二千領供
五臺山衆僧寫一切經三部各一萬一千卷其先所
造石壇浮圖忽然放光和尚顯現菩薩三目六臂自

名般若仙爲講說靈驗唐朝諸人胡國峴嶧新羅等
人皆以鑒真爲受戒和上講四分律及法礪疏滿四十
遍講律鈔七十遍講輕重儀十遍講羯磨疏十遍
親度僧尼四萬有餘歟中智行拔群者四十餘人各
化一方俱是龍象皆究律藏兼研經論或是法相天
台或是俱舍三論攝論維摩詰等衆典無不該暢和
尚來朝之時隨身聖教廣多非一厥中律宗諸典天
台諸文寶持是衆隨來弟子法進曇靜思託義靜法
載法成等一十四人益是智解名哲皆兼合宗所立
戒場有三重壇表大乘菩薩三聚淨戒故於第三重
安多寶塔塔中安釋迦多寶二佛像表一乘深妙理

皆冥合之相鑒真和尚宗研天台律弘四分四分當
宗分通大乘況依內證天台敎宗立壇弘律一乘法
華開龐顯妙毗尼學者即大乘學五篇七聚即摩訶
衍第一義光非青黃等三歸五戒八戒十戒皆是一
寶妙摩訶衍梵網大乘三聚十重六八八萬頓說頓
圓即與妙圓一味會同平等夷齊發權絕待本來一
實開發俱時法位居然待龐顯妙偏外有圓和尚弘
律猶非待龐豈涉藏通共門之義當知純圓頓妙極
戒所結戒場一乘頓極三聚圓壇登此圓壇受戒法
者通受則頓發三聚普遍之體別受則成三聚周圓
之義祖師和尚傳戒立壇高廣深妙意致如是諸宗
學人於此戒壇各受戒法隨宗立義皆是大乘一實
境界鑒真和尚顯揚梵網彼經義途用撲揚疏及法
銑疏而撲揚師依天台義廣作義疏後學法相專弘
彼宗道璿律師註梵網經全依撲揚疏之遐邇法進
僧都註梵網經全是台宗弘和尚化進公有功和尚
以戒壇院及唐禪院讓干法進大僧都即爲戒壇第
二和上天台敎觀二代弘之華嚴宗人登此寶壇受
具足戒及三聚戒即得成就十玄六相四種法界舉
一全收相即相入主伴具足重午無盡通別二門深
廣戒法三論宗人此壇受戒即得成就依名入實甚
深因緣見道無得無方圓戒普遍周通微妙自在法

相宗人受此戒法通包三聚盡未來際一一戒具三
聚戒義律儀一戒全同諸律本自應理同遍圓實真
言行者登此壇上受具戒者即成秘密金剛不壞勝
義行願三摩地壇五相成身四重曼茶六大相應佛
性圓體唐招提寺豐安僧正戒律宗旨云此戒或名
三摩耶戒武名金剛戒或名佛性戒已三摩耶戒即
三聚法金剛寶戒及佛性戒即梵網中三聚通名俱
舍成實隨入法相三論兩宗隨應依既大乘學人傍
知小宗日本自昔唯有大乘學人行者本自無有小
乘行人豐安戒律宗旨中云問大小二教律宗何攝
答惣東諸戒學以為一宗之於我朝唯有菩薩律師

元來無爲偏執局見小乘故四分律亦義大乘故宣
律師四分律鈔中教授云發上品心言上品心者斷
一切惡修一切善度一切衆生成佛從初迄今壇上
師僧教授詞句在於茲也故戒律云所說諸功德皆
共成佛道又若有自爲身欲求於佛道當尊重禁戒
此是諸佛教已此中意云擗取一切大小二藏所說
戒學以爲一宗菩薩廣大之心擗攝一功法故以此
國都無偏局小者故縱學四分小乘毗尼此亦都非
偏小之教分通上乘義隣大極况非止此通大之教
梵網極乘金剛寶戒宏宗心地深遠者乎南山大師
圓教城心以此為宅攝諸戒學皆會大乘並契法性

即同瑜伽懲集蘊積三聚廣大甚深戒藏問瑜伽所說云何圓教答天台大師判云彌勒以二番四悉壇造地持論通華嚴上地持即是瑜伽菩薩地同本異譯所釋華嚴既說別圓二教能通地持瑜伽豈無圓教義乎今依圓教成立宗義頓入圓人不用開會經小乘者必用開會法華唯被經小之者是故必用開三顯一頓大行者唯是應用法華所入不應強同小乘須開顯之者鑒真和尚傳戒已來以臨壇和上^基律宗緒七大諸寺律師以戒臘爲任次第其事永代千今不絕至習學律藏者雖諸寺有律宗唐招提寺自昔相續 烏羽天皇御宇保安三年壬寅中川實

範大德造戒壇式中興戒律之時即彼上人徃招提寺傳受戒律自爾已來宗緒繼續鑒真和尚天平寶字三年^妃建唐招提寺安置佛舍利以持戒力鎮護國家即嘗地味知律法久住弘法礪建疏并定賓記南山律宗等和尚在世住法務大僧都并僧正圓寂之後贈大僧正焉天平寶字七年癸卯五月六日入滅春秋七十六和尚以招提寺付如寶法載義靜三人三人同心勸人造寺講學律法橫豎繁昌和尚有十一人門輩各有從屬互燃一燈枝流繁廣不可勝計且如寶小僧都弟子有豐安贈僧正豐安弟子有道淨律師道淨授律法于仁階大德仁階授之真空

大德如此六代次第而來又鑒真如寶豐安圓勝豐
慧安康如是六代又鑒真法載真璪戒勝壽高增恩
安談喜寬如是八代傳持而來此時即至人王第六
十一代・朱雀天皇御宇承平元年辛卯自爾已後
住持寺院繼續律法宗緒不絕橫豎甚多而其名行
不記干世人名難知雖然習學不絕宗黨相續自承
平辛卯至第七十四代 烏羽天皇御宇天仁元年
戊子經一百七十八年不知宗緒人名厥後實範授
于菩提院藏後贈僧正俊公授于學無僧正覺憲授
于貞慶上人貞慶授之于戒如覺真乘心等戒如授
于不空陀圓晴大德唐招提寺覺盛大德等此等

中古戒律相承皆是學解傳持不絕其後第八十六
代 四條天皇御宇嘉禎二年丙申圓晴覺盛慈禪
穀尊四德自誓受戒三聚通受自爾已來如法持戒
如教持律次第相承充滿諸方不可知數北洛泉涌
不可棄法師入宋傳律四般弘律南北多端恐繁不
陳

天台宗

昔人玉第四十六代 孝謙天皇御宇天平勝寶六
年甲午鑒真和尚賈天台宗章疏而來譯摩訶止觀
法華玄義法華文句小止觀六妙門等也和尚門人
法進曇靜思託如寶等並天台宗學者也道璿律師
亦學天台鑒真和尚在唐之時湛然法師記章未作

然公天寶元年壬午年三十二出家同八年己丑三十
九受具足戒當日本國天平勝寶元年己丑然公
自俗習天台敎鑒真年五十六天寶二年癸未進發
日本故湛然師雖學台教未施詎述鑒真不及寶持
來朝傳教大師作天台付法緣起三卷其中引道釋
鑒真并其門人法進等爲弘天台之近故彼文云大
福律師先入和國乃傳圓明利益有情白塔僧統後
遊日本復傳圓義開佛知見所以大安唐律注戒經
於此蘊東大僧統注梵綱於唐院兩聖用心弘天台
義辟生同欽天上甘露記餘如彼明鑒真和尚旣傳
台宗于此國而未廣講敷先弘戒律故從勝寶六年

甲午至第五十代 日本根子皇統弥照桓武天皇
御宇延曆二十三年甲申經五十一年當大唐貞元
二十年甲申此年傳教大師奉 詔入唐即謁天台
山國清寺道邃和尚受學天台宗又隨佛瀧寺行滿
座主學台宗教遇順曉和尚傳受真言教亦值道邃
受菩薩戒延曆二十四年乙酉八月歸朝厥時天台
教觀妙樂諸記餘師記述皆傳無遺然傳教大師入
唐已前獲鑒真和尚將來天台敎觀諸文研精洞覈
方講三大部一遍已畢亦更講之至半未畢其後入
唐值師受之歸朝之後弘之北穀山名延曆寺傳教
大師諱最澄延曆四年乙丑年甫十九初住穀山作

建興務七年戊辰建立中堂大唐之人名之日本天台山大師延曆十六年丁丑齡三十一天心有感預內供奉例以近江正稅充山供科大師發願寫一切經論章疏等弟子經珍穀勝光仁等皆俱助寫又老經藏妙勝等於七大寺勸經生之供大安寺僧開最於龍淵寺大安寺別院助成此願衆僧傾鉢添經生供事果卷成延曆二十年辛巳最澄年三十五請七大寺英哲勝猷奉基寵忍賢玉光證觀敏慈詰安福玄耀等十大德於比穀擊一乘止觀院修法華十講自此後代每年無闕同二十一年壬午正月十九日朝議大夫和氣朝臣弘世於高雄山延請七大寺高僧善

議勝猷奉基寵忍賢玉安福勒操修圓慈詰玄耀歲光道證光證觀敏等十餘大德講演天台法門天皇下勑穀感是深日本開天台會乃此為初此年所講即止觀玄義文句也大師此年初蒙渡海宣旨大師弘天台於穀山門人極多俱學台教弘仁十三年壬寅六月四日入滅春秋五十六先三十八渡海入唐歸朝興宗一十八年弘仁十四年二月九日依勅宣改穀峯一乘止觀院之名賜延曆寺名額貞觀七年乙酉十一月依圓珍小僧都之奏贈号傳教大師遷化之後經四十四年天台初傳監真和尚入唐傳之大興此宗者傳教大師是前力也山門李願号為

始祖有義真和尚元是大安寺與傳教師同住彼寺
與傳教同入唐同時學法俱歸本朝同興穀山爲穀
峯第一座首奉勅詔撰天台法華宗義集一卷於
延曆寺立菩薩戒壇傳教之時雖有奏聞七大寺六
綱訴詔不許天長十年癸丑七月四日入寂春秋七
十七諸從仰德号修禪大師仍次本願大師爲台教
宗緒圓澄大德傳教上足研精台宗大獲玄奧天長
十年癸丑任第二座首光定圓仁並傳教神定光定
繙素崇敬號別當大師圓仁阿闍梨後贈号爲慈覺
大師慈覺承和五年戊午年四十五入唐學法更習
天台大學真言在唐學法十年仁明天皇御宇承

和十四年丁卯歸朝厥後經十八年大弘顯密二宗
傳教大師初傳密教慈覺大師更傳真言山門真言
慈覺所傳後代繁昌橫豎弘興清和天皇御宇貞
觀六年甲申圓仁入滅春秋七十一夏臘四十九明
年乙酉傳教慈覺俱贈大師号金剛頂經蘊悉地經
各製七卷疏現行于世次有圓珍阿闍梨是義真和
尚上足精詳宗旨該博包攝第五五代文德天
皇御宇仁壽三年癸酉入唐學法于時年四十當唐
大中七年癸酉隨良諦和尚受學台宗隨般若恒羅
三藏法誣阿闍梨慧輪阿闍梨同受秘教盡兩部玄
奧在唐學法六年天安二年戊寅歸朝厥後三十四

年弘通顯密達興真俗第五十九代 字多天皇御
宇寛平三年辛亥遷化春秋七十八贈号智證大師
智證弟子有增命良基康濟猷無等各研教觀橫豎
流通智證門人皆在穀山弘通宗旨号山王院門流
是也後遷園城寺盛弘通顯密寺門天台別有相承
慈覺門人學侶極多慧亮安慧遍昭長意相應等也
安慧授法于安然然公亦承慈覺慧亮弟子有滿賀
賀公弟子有良源号慈慧大僧正慈慧門人有源信
覺運兩哲如次慧心檀那兩德後代各立門從乃此
兩德門流慧心僧都門人有寬知覺超等又皇覺範
源者慧心之清流永辨智海者檀那之榮葉俱流名

於遐邇飛威於遠近證真靜嚴並肩耀法光顯真明
禪繼踵踏教迹天台座首爲宗重職法緒曆焉繼續
無窮

真言宗

真言教法東流傳來濫觴由漸事非一途昔人王第
四十四代 元正天皇御宇養老二年戊午道慈律
師從唐歸朝在唐一十八年習學六宗三論爲本入
唐已前隨義淵僧正學法相宗在唐六宗真言隨一
求聞持法特所精詳自行化他啻以此法或云道慈
隨智鳳受求聞持法而年代可考道慈以真言法授
善議慶俊議公授之干勤操僧正勤操授求聞持法
于弘法大師大師入唐已前於阿州大龍寺土州室

户嶠等行聞持法道慈於唐隨善無畏三藏受學真
言開元四年善無畏來同六年戊午道慈還日本三
箇年中於唐傳受善無畏來大唐初譯虛空藏求聞
持法開元十二年甲子已前譯大日經并蘇婆呼蘓
悉地經三藏譯大日經為弟子一行開講敷演一行
隨講聞即記錄此間定經年月日時隨講結集成一
經疏有二十卷然一行禪師開元十五年奄卒無畏
其後應來日域父目東邊立一基塔三年之後還干
大唐三藏於大唐國奄焉物故年九十九三藏裹玉
而來根機未熟納經安塔干後弘法大師具感靈夢
即往彼寺獲大日經以此緣故有入唐志善無畏三
即往彼寺獲大日經以此緣故有入唐志善無畏三

藏來朝之年雖無記錄應是聖武天皇御宇神龜
季曆天平初運此數年間弘法大師延曆二十三年
甲申越海入唐遇青龍寺慧果阿闍梨兩部大法秘
藏奧旨窮究淵府傳受已畢平城天皇御宇大同
元年丙戌歸朝歸朝之年當大唐第九主德宗皇
帝貞元二十二年丙戌大師年三十三比穀傳教大
師與弘法同船入唐彼學天台教觀兼傳真言即值
順教和尚傳受兩部秘法明年延曆乙酉歸朝天台
教觀并真言教弘法穀傳教大師專學真言傳多
秘藏歸朝弘法普天歸宗諸方傳受自爾已來諸德
間出越海求異各傳蜜乘歸朝弘法古來諸德入唐

傳蜜前後連續揔有八家一傳教大師二弘法大師
三小粟常曉和尚四靈巖寺圓行和尚五穀岳慈覺
大師六安祥寺慧運大僧都七穀岳智證大師後名
三井寺八圓覺寺宗叡僧正名之惣爲八家真言雖有八
家朝宗所歸不過東寺天台兩流傳教慈覺智證三
流並是天台餘皆東寺然所立義途所歸與旨孤絕
獨步達興高阜唯是弘法大師所傳東寺真言所趣
而已依大日經菩提心論等立十住心攝一切教所
立真言天超顯宗出華孤標極秘深奧弘法大師興
秘宗特顯教諸宗或有敵論或有對談大師直現祥
瑞顯覺頓極諸宗信伏無敢措言弘法大師承和二

年乙卯三月二十一日於高野山入定受法弟子有
若干人各研秘藏橫豎流演第三世下頓分小野廣
澤兩流乃益信聖寶兩哲其人也至千後代漸出派
流燈燈相承流流互潤各播威肅俱彰靈德諸流義
途衆門理致所立非一所說是多非可具陳豈言盡
哉

上來略陳八宗所傳之緣起竟然震且國弘通禪法
是達磨大師所傳宗旨也道睿律師傳北宗禪授之
大安寺行表和尚行表授之傳教大師傳教受之弘
干穀山南宗禪法昔未傳之近代禪師或從唐而來
此或從此而往還皆是南宗其事甚多非可數盡震

且諸師弘淨土法日本光德不立爲宗諸宗先哲各隨自宗立義陳宗弘通而已近代源空上人已後立淨土宗弘通世間空公門人各立徒屬義途極多破立無窮其事繁廣不能具陳若加此二應是十宗佛法首歸無過此數功業不虛必成二利而已

三國佛法傳通緣起卷下

千時應長元年辛亥七月五日於東大寺戒壇院
述之 華嚴宗沙門 穎然 春秋七十二
造此三國佛法緣起三卷奉爲 叢覽獻上
大覺寺法皇御所干此 御所叡感以此

草木最初寫之畢

沙門 穎然造此佛法緣起并十重唯識瓊鑑章一卷心要義鑑一卷進覽之其中十重唯識者奉 勅命於御前委細講讀之了彼十重唯識之後顯示華嚴宗義諸門八十餘科法門長行問答略釋後拳偈頌頌有八十五條八十三頌皆綴四韻於中二頌五言四韻唯識總結八韻述懷四句二韻愚草遊心頌百首之內抽出八十三頌載之心王等五種唯識本覺業等九相及三祇頌合十七條不載之彼載列諸頌瓊鑑唯一本書在

法皇御所而已

戒壇示觀律師學該乎三藏智辨汙瀾馬空
有性相猶庖丁之於牛也且所遺之心盡凡
千有餘卷焉然不出卷而投諸宗之間城知
三國之傳通者莫若乎斯書也苟從事于此
者豈不云乎圓千里之迷途者一呼之力也
不遇於斯說則吾終昧於大方者邪所恨未
約刊行所利不廣仍命工鋟板云爾

應永紀年正月日

佛教大學藏

273855

寬永九年甲子六月日長列文俊

